

gleichwol wahr vnd wird wahr bleiben / daß solches in der That also sey. Vnd wiewohl der Spiritus Urinae zu sehr vielen operationibus Chymicis nützlich vnd gut zu gebrauchen ist; so habe ichs mehrertheils der Medicin zu lieb offenbahret / dann so man solchen in copia, ohne mühe vnd kosten distilliret / kan man desto reichlicher damit vmbgehen; vnd dienet dieser Spiritus sonderlich zu truckenen vnd nassen Bädern / dadurch sehr viel schwere vnd von den gemeinen Medicis vnheilbahr geachte Kranckheiten / leichtlich vnd schleunig / radicitus können curiret werden / dann dieser Spiritus operiret in seiner grossen Krafft miraculosè, ja thue mehr / als ich sagen darff vnd kan / daß ehre vnd gut dardurch erlangt werde. Nun siehestu günstiger Leser / daß dieser Punkt so vnachtsamb nicht ist / als er von vielen darfür ist gehalten worden: Wann es die Zeit vnd Gelegenheit hätte leiden wollen / ich hätte wol ein mehrers von seiner mächtigen Krafft / Tugend vnd Würckung schreiben können / kan aber zu seiner Zeit an einem andern Orth füglicher geschehen.

X V I I.

Den Spiritus Salis in grosser Mänge zu machen / mit sehr geringem Kosten / daß auch ein Pf. kaum 6. stüber zu machen kostet / vnd zu viel nützlichen laboribus, so wol in Medicina, Alchymia, als andern Künsten / kan angewendet werden / als vnter andern diese folgende Stücke.

In Ersten Tractat / meiner Philosophischen Defen / ist gelehret / wie man den Spiritum Salis
 leicht